

Primera carta del apóstol San Pablo a Timoteo

Pablo escribe a Timoteo

1 ¹As Pábloat bah acu ayin carit uch cuihsuro. Bah Timoteo acu ayin cuihsuro. Asan Jesucristo chih́tá ehcúquibro. Sirat asan Jesucristo chih́tá ehcuquib yehn áyjacro. Jesucrístoat asan eyta yehn áyjacro. Isat sihẃat, Jesucrístoat isan Sir quin beyin acu binro. Isat eyta sihẃac etar eyat is beyic acor itro. ²Timotéou, bahan as acu ajmár wacj́an wanro. As ajc cut chih́tá uní bi cajac reht as acu wacj́an wanro. Sirat Tetát cat Cara Jesucrístoat cat bah sehnác etar aját bah cuitar conro. Bah obir yajcayta acu, bah cuécuti acu, bah ohbac ítayta acu conro.

Advertencia contra enseñanzas falsas

³Asan Macedonia cajc cut raquín inár aját bahan Efeso pueblo cuitar acsar itin wac bahjacro. Erar uwat Sir chih́tá tehmar siẃro. Bahat éyinat eyta siẃquey acsar siẃti síwayta acu wac bahjacro. ⁴Ruiyin ojcor cuitra teẃti síwayta acu wac bahjacro. Cohtín saẃ ú bálnajar bin saẃuti síwayta acu wac bahjacro. Eyta téwýeyra, eyta saẃúyeyra, uwan rahra rahra tecuay yináyqueyra. Sir ima chih́tá sinti rehácýqueyra. Sir tamo séhẃati rehácýqueyra. ⁵Cuatán uwat aját yajc ayin cuihsuquey yarsa cácat, imár owár rahra rahra sehnác chácayqueyra. Eyta yajc ayin cuihsuquey caquir cuitar uw ur ay rehácýqueyra. Sir ub cahmar imarat caba yajquíc síhẃayqueyra. Sir tamo cat síhẃayqueyra. Eyta rehquít uw cat sehnác chácayqueyra. ⁶Uwa cahujinra eyta rahcti cuar Sir chih́tá wácajacro. Eyta wacar, rahra rahra téẃajar bin teẃay yinjacro. ⁷Eyta teẃay yinjáqueyin Moisés bachan chih́tán ay sinti cuar, chih́tá ey cahujín siẃ in síhẃaro. Imárati ay rahcti cuar cahujín siẃ in síhẃaro. Isti cuar siẃ in síhẃaro. ⁸Isat ítitan, Moisés bachan chih́tán ayro. Uwat ey cuayir sintitara, chih́tá ey cuitar icúr yajcata bíntara ay yajquítara bachan chih́tán eyan ayro.

⁹Cuatán uch séhw̄awi. Ur ay bin urai wahitín acu Sirat ey bachan chihtán wítiro. Cuatán ur ay bár binat imár ur icar ur ay bár yajquíc istayta acu wíjacro. Ur ay bár bachuti yájquinat cat imár ur icar ur ay bár yajquíc istayta acu wíjacro. Chihtá yajti binat Sir tamo síhw̄ati binat cat, Sir ajcá bár béquinat cat, tetín abín yaúquinat cat, ¹⁰isár yájquinat cat, imár serin owár isár yájquinat cat, uw ahár siu béquinat cat, sucuar téw̄quinat cat, uw cahm icar sucuar téw̄quinat cat imár ur icar ur ay bár yajquíc istayta acu Sirat Moisés quin bachan chihtán wic bahjacro. Býinatan Sir chihtá ay bi ruh̄w̄úyatan éyinat cat imár ur icar ur ay bár yajquíc istayta acu bachan chihtán wíjacro. ¹¹Sir ima chihtá ay bi eyan as quin ehcú áyjacro. Chihtá ey bahnáquinat ítitan, ayan cuitro. Chihtá eyta bi as quin wiquir car ehcú áyjacro.

Gratitud por la misericordia de Dios

¹²Eyta cuácayat Cara Jesucrístoat ima chihtá aját uw quin ehcún acu as áyjacro. Anto as cati jat Sir imát ítitan, aját ima chihtá tehmoti ehcwata etar as cájacro. As caquir as quin urá wíjacro. Urá wícayat aját ey quin “Oquéy, bahat as obir yajacro,” wacaro. ¹³Récaram Jesucrístoan ajátán ajcá bár chájacro. Ey ojcor ahsín tew̄jacro. Ey chiwa cat ruh̄w̄ujacro. Jesucristo chihtá cat cahujinat cati acu aját técuajacro. Aját eyta yajác cuar, eyat as racar cue rehquír as síujacro. Aját istiti rabar yajquíc etar as síujacro. Aját Jesucrístoan Siri bár seh̄war eyta yajcayat eyat as síujacro. ¹⁴As sehnác rehquít, Cara Sirat as obir yajacro. As obir yajca rabar Jesucristo tamo séhw̄ayta acu as quin urá wíjacro. Uw sehnác chácyta acu cat urá wíjacro. Jesucristo ajc cut eyta yajcayta acu urá wíjacro.

¹⁵Uchta waquitán uniro. Chiht uchan ay rahcwi. Ur ay bár bin siwin acu cajc uch cuitar Jesucristo wijacro. Eyta wac uyan uniro. Urá ay bár eyin sicar asan tahnác binro. ¹⁶Ur ay bár tahnác bin tacat as síujacro. Uwat Jesucristo ur ayan tahnác rehquíc istayta acu eyat as síujacro. Jesucrístoat uw racar rehquít cuécuti tan uquic istayta acu eyta síujacro. Jesucristo chihtá yahncút cácata éyinat Jesucrístoat síwata chihtá istayta acu Sirat as cuécuti tan uquir síujacro. ¹⁷Uwat Cara etiti rehquey ajcá ji beyátaro. Cara etiti rehquey ojcor ayan cuít wacátaro. Cara tahnác eyan Sitro. Eyan yara báreyra. Ub cut istiti binro. Sir istanro. Istiyrá ey owara cutiro.

¹⁸Timotéou, bahan as acu wacján wanro. Aját bah quin uchta yajc ayro. Sir chihtá ehcúquibat bah icúr yajcáy yehnata récaji ehcujaquey tan chinti jaw̄i. Ey tan chinti séhw̄ara rabar, ey chihtá wácati etiti ehcuwi. ¹⁹Eyta yajca rabar Sir tamo etiti séhw̄awi. Bahat ur icar Sir ub cahmar bitara yajcata bin séhw̄actara, tehmoti yajw̄i. Cuat cahujinat imár urá cut bitara yajcata bin síhw̄aquey yajti waca téjecro. Eyta waca técayat, Sir chihtá cat wácajacro. ²⁰Serin Himeneo cat Alejandro cat Sir chihtá wácajacro. Aját eyin Satanás Sisrama at icar wíjacro. Eyinat acsar Sir ojcor Jesús ojcor ahsín tew̄ti acu eyta wíjacro.

Instrucciones sobre la oración

2 ¹Aját récajian uch waquinro. Bahnaquin cuitar Sir ojcor conwi. Bahnaquin cuitar Sir quin chiwi. Bahnaquin tamo sihw̄ar Sir quin “oquéy” waw̄i. ²Rey carin cuitar cat, carin bahnaquin cuitar cat Sir quino chiwi, Sirat eyin cuitar yajcayta acu. Is ohbac itin acu, técuati itin acu, Sir tamo ohbac sihw̄an acu, is bahnaquin ur ay itin acu, eyin cuitar Sir ojcor conwi. ³Uwat carin cuitar bahnaquin cuitar conyat ayro. Siran ahniro. ⁴Síratan bahnaquin siu cun rehcaro. Uwa bahnáquinat Sir chih̄tá rahcyat Siran ahní rehcatáro. ⁵Siran istanacro. Sir cac cahmar uw cuitar waquib cat cuis istanacro. Sera Jesucristoan eyro. ⁶Bahnáquinat Sir tayar yajác Jesucristoat tunin chinjacro. Eya tunjac chih̄tá ehcúc cuitar cab cucayat, bahnaquin cucáj acat ehcujacro. ⁷As cat ey chih̄tá ehcún acu cájacro. Jesucristo chih̄tá ehcuquib yehnín acu, Sirat as cájacro. Judío bár bin siw̄ in acu cat Sirat as cájacro. Aját eyta siw̄yat judío bár binat cat Jesucristo tamo Sir wacj́i síhw̄ataro. Chih̄tán uní bi eyta siw̄ in acu Sirat asan eyta cájacro. Aját uní wacaro. Súcuari téw̄tiro. ⁸Eya bijira ajatán bahnaquin quin uch waquinro. Caje bahnác cuitar serin bahnáquinat Sir ojcor conwi. Sir ojcor confín acu Sir tamo ay sihw̄an acu atcar yehw̄i. Turti, técuati cuar eyta conwi. ⁹Aját wiw̄ in quínoan, chauwín quínoan uch waquinro. Jesús chiwa owár sécuayat, oya ow̄ata bin ey ow̄i. Bahnáquinat bah wahitayta acui óroti jaw̄i. Siatí oror bití jaw̄i. Rootí ítuwi. Uwat behmár tamo séhw̄ayta acui cuis anar cuitra óroti jaw̄i. Cuc ray, cucách ray, oya ajcan cuít bi chati jaw̄i. Behmár tamo cuít séhw̄ayta acui éytara chati jaw̄i. ¹⁰Cuatán behmár tamo séhw̄ayta acura ay ítuwi. Sir tamo séhw̄aquin wiw̄ inat yajcata bin eyta yajw̄i. ¹¹Uw owár sécuayat, wiw̄ inat aje sarac cuar sinwi. Carin chih̄tá caquir cuitar ay sinwi. ¹²Wiw̄ inat serin siw̄ in acu aját aje waátiro. Serin ayin acu aje waátiro. Wiw̄ in aje sarac chaquin ácuacuano. ¹³Récajian ruiy Adán Sirat yehn áyjacro. Ey yahncutra Sirat ruiy Adán wiya Eva yehn áyjacro. ¹⁴Sisramat cayar yajcáy yehnyat, Adánatra ey ria cátiro. Cuatán Evaatra cájacro. Eya caquir cuitar Evaat Sir tayar yajacro. ¹⁵Eyta cuar wiw̄ in Sir tamo wácati séhw̄actara, uw sehnác cháquictara, Sir ub cahmar ur ay ítictara, yajcata bin yajquíctara, eyin sasá cat ay cac síctara, Sirat eyin síwayqueyra.

Cómo deben ser los obispos

3 ¹Uwat wáqueyan uch uniro. Uch rahcwi. Bíyinan Sir chiwa cara yinín síhw̄actara éytawan ay síhw̄aro. ²Sir chiwa carin yinata éyinra uchta bin yinátaro. Eyin ojcor uwat icúr ques icar ríoti bin yinátaro. Eyinan wiya istanác yehw̄ jaquin yinátaro. Ay síhw̄aquin yinátaro. Cuayar yajti bin yinátaro. Uwat ey tamo ay síhw̄aquin yinátaro. Uw quin ubach cat, ira cat wiquin yinátaro. Ay síw̄ata bin yinátaro. ³Simat cat yehnti itquin yinátaro. Uw tiw̄ti bin, uw owár ohbac técuati itquin yinátaro. Tan wan ténaquin yinátaro. Ray racar isoti bin yinátaro. ⁴Im usi itquin yarsa ayquin yinátaro. Sasá cat yarsa ayquin yinátaro.

Imár sasát cat imár chihtá yarsa caquin yinátaro. ⁵Imár sasán imár owár ítquinan cat yarsa áytitara, Sir chiwa cat yarsa aya báreyra. ⁶Jesús chihtá awan cájaquinra cara yínajatro. Jesús chihtá awan cajac eyin carin yínyeyra imaran bahnaquin cuít síhw̄ata óraro. Eyta síhw̄a yínyeyra, récaram Sisramat ay bár yajcayat Sirat cuecu eyta, eyin cat eyta cuécwayqueyra. ⁷Jesús chiwa bár binat cat biyin tamo ay síhw̄actara eyin yinátaro. Eyta bár cuácayatra Jesús chiwa carin yínajar binro. Eyta yínyeyra Sisramat eyin cayar yajcata óraro. Urá ay bár yajc áyata oraro. Eyta cayar yajti acu Jesús chiwa carin yinata éyinra aját waquíc eyta bin yinátaro.

Cómo deben ser los diáconos

⁸Bfyinan carin cuitar yajquín síhw̄actara eyin cat carin éytaan wan rehcata binro. Uwat eyin tamo ay síhw̄aquin eyta yajquín yinátaro. Ur istanác tew̄quin eyta yinátaro. Sima bunara bár bin yinátaro. Raya racar isoti bin yinátaro. ⁹Sir chihtá bahnác Sir ub cahmar cácata bin cájaquin yinátaro. ¹⁰Bahat carin cuitar yajquín caca rabar anto yinín cahmar, eyin bitara ítítara eyin urá wahitátaro. Eyin urá ítitan, ur áytara, carin cuitar yajquín yinátaro. ¹¹Eyin wiya uwat ajcá ji béctara, yinátaro. Eyin wiyat uw riótítara eyin yinátaro. Eyin wiyat ay síhw̄actara, eyin yinátaro. Eyin wiyat bahnác urá istanác cuitar yájtara eyin yinátaro. ¹²Eyinan wiya istanác yehw̄ jaquin carin cuitar yajquín yinátaro. Imár wiya cat, sasá cat, usar ítquin cat yarsa ayquin yinátaro. ¹³Cuítar yajquín éyinatán canar ay yajquíctara, uwat ítitan, éyinan urán ayro. Eyinan uwat ur ay ític etar éyinat uw quínoan Sir chihtá rooti ehcwátaro. Eyta ític eyin yinátaro, carin cuitar yajquín.

El secreto de nuestra religión

¹⁴⁻¹⁵Asan bah quin awan ben séhw̄aro. Cuatán asan biti cuácayatan, chihtá uch bah acu cuihsúr ayro. Sir chiwat bitara yajcata bítara ey istayta acu aját ey cuihsúr ayro. Sir chiwan owár binat Sir queni tamo síhw̄aquinro. Uw éyinat Sir chihtán tehmoti ehcuquinro. ¹⁶Récaji uwat istiti cuar Sirat ima chihtá is quin ehcujacro. Ey chihtán ayan cuítro.

Sir iman sibár ji ar ji uw cac cahmar waajacro. Ajcan Camur Eyat ítitan, waajáqueyat ur ay bár yájtiro. Sir cacmín cuacúr binat cat ey itchacro. Uw bahnaquin quin ey chihtán ehcujacro. Ehawayat uwat ey chihtá cájacro. Eyan carin cuít yehnár, uw cac cahmar sicor cuacúr bijacro.

Los que se apartarán de la fe

4 ¹Sir Ajcan Cámuran Eyat uch chihtá orac rahcuayta acu wacaro: “Cábara tinic cab cu racayat, cahujinat Sir chihtá cájaquey sicor waca téyqueyra. Uw cayar yajquin acu, súcuarin acu chiwa chácayqueyra. Sisrám chihtá, rusám chihtá uní bár ey rahcuáyqueyra. Rahcuír car Sir chihtá sicor waca téyqueyra.” wacaro. ²Chihtá uní bár ey urá bucáy binat siw̄ro. Urá bucáy bin éyinat sucuar tew̄ ic báhntiro. Sucuar tew̄ ic bahnti rehquít eyin ur ay bar icar áyjacro. ³Eyinat uw quin wiya cat yehw̄ áytiro. Ira cat, ruwa cat icúr bi bin coh áytiro.

Cuatán ir eyan, ruw eyan Sírtan uw cohyta acu chájaquinro. Ir eyan Sir ima tamo síhwáquinat cat cohyta acu chájaquinro. Chihtá uní bi sínjaquin éyinat Sir quin “Oquéy, bahat is obir yajacro,” wacátaro. Eyta waquíy yarsa cóhtaro. ⁴Sirat chájaqueyan bahnacan ayro. Ir eyra, ruw eyra bachuti cohta binro. Sirat bah obir yajác sehũa rabar icuran biyan cóhntara eyan yarsa cóhtaro. ⁵Sir tamo sehwar cóhctara, Sirat íttan, eywan yarsa cóhtaro. Sir ojcor conár cat Sir ub cahmar yarsa cóhtaro. Cuat súcuarinat uw quin ir ey ruw ey coh áytiro.

Un buen siervo de Jesucristo

⁶Chihtá eyan Jesús chiwa quin ehcuwi. Eyta ehcwáyatan, bahan Sir chiwa acu caran ay yehnáyqueyra. Eyta ehcwayat uwat bah tamo ay síhwátaro. Bahatán Sir chihtá cuít cajac istátaro. Bahat Sir chihtá récaji rahjác ey acsar acsar sin biquic istátaro. ⁷Uwat ruiyin ojcor ehcwáyatra, bahatra eyra cuít rahcti jawí i. Chihtá cuayir bi ehcwáyatra rahcti jawí i. Ey tamo séhwáti jawí i. Ehcuti jawí i. Cuatán Sir queney tamo sehũa ac sinwi. Sir chihtá yajquíc sinwi. ⁸Uwat sibár chihjír ji chaquic sínnyatan ayro. Cuat Sir chihtá yajquíc sínnyatan ayan cuitro. Sir chihtá yajquíc sinyat cajc uch cuitar cat, cuacúr Sir owár chácayat cat, is acam ay rehcaçãoqueyra. Ahajira cajc uch cuitar ita rabar ey chihtá cuitar ohbac ítataro. Cabar tinyat cat ey cuitar tan wan waátaro. ⁹Uwat ey ojcor eyta téwqueyan uniro. Ey chihtá ohbac cácataro. ¹⁰Eyta etar íjmár cuitatrun eyta séoti yajcaro. Isan Sir queneyat is siwic acor itro. Eya bahnaquin acu síuquibro. Ima chiwa wácati síwayqueyra. Eyta cuácayat íjmár cuitatrun ey chihtá yajcaro. ¹¹Ey chihtá uw quin yajc aywi. Ey chihtá uw quin siwí i.

¹²Bah anto síbiji etar uwat bah ajcá bár chácata óraro. Eyta cuácayat bitara yajcayat, uwat bah tamo ay síhwátatara, eyta ay yajwí i. Sir chihtá cut bitara yajcata bíntara, bahatán eyta yajwí i. Sir chiwat bitar wacata bíntara, bahat cat eyta wawí i. Sir chiwa bitar ítata bíntara, bah cat eyta ítuwi. Uw sehnác chácata bíntara, bahat cat uw eyta sehnác chawí i. Sir tamo séhwáta bíntara, bahat cat Sir tamo eyta séhwáwi. Ur ay jácata bíntara, bah cat ur ay eyta jawí i. Sir chiwat bahat yajquíy eyta yajcayta acu bahatán eyta yajwí i. ¹³As bah quin bic oceso tasan, Sir cáritan uw cac cahmar etiti tawi. Etiti ehcuwi. Etiti siwí i. ¹⁴Récaji werjayínát bah cuis otar atcar chácayat, bah quin urá wíjacro. Werjayínát Sir chihtá ehcúr cuitar bahat Sir chihtá ehcwayta acu urá wíjacro. Ehcwayta acu urá wíjaquey ajcá bár chati jawí i. Cuatán ey cuitar Sir chihtá ehcuwi. ¹⁵Bahat eyta yajwí i. Etiti yajwí i. Eyta yajcayat bahnáquinat bah urán cuít rehquíc istáyqueyra. ¹⁶Yají jawí i. Behmát Sir chihtá yají cawí i. Siwí ic ey cat ay siwí i. Sir chihtá wácati ay yajcayat, Sirat bah cuitar wacáyqueyra. Bíyinat bah chihtá rahcyat, eyin cuitar cat wacáyqueyra.

Cómo portarse con los creyentes

5 ¹Werjayín técuati jawí i. Cuat werjayín quin ajc uní cuitar wawí i. Behmá tet quin ajc uní cuitar waquíy eyta, werjayín quino cat eyta wawí i. Anto síbijin acu cat ay yajwí i. Behmá taná acu yajquíy eyta, síbijin acu catum eyta ay yajwí i.

²Behmá ab acu yajquír eyta chauquín acu cat eyta ay yajw̃ i. Behmá chítá acu yajquír eyta, cahbarin acu cat eyta ay yajw̃ i. Eyin owár cuehsti ay yajw̃ i.

Las viudas

³Sácajaquin wiya bahjaquin tamo cat séhw̃awi. Sácajaquin wiya istir bahjaquey eyin tamo cat séhw̃awi. Eyin ajcá ji béowi. ⁴Cuatán sácajaquin wiya iman sasá chítara, wihninán chítara, sasá éyinatan, wihnín éyinatan imár cayin ajcá ji béyataro. Imár cayin obir yajquíc sínataro. Síratan eyta obir yajquín wajacro. Imarat sicor ab quin tunin acu eyta yajquín wajacro. Eyta jaw̃ yajcáyatan, Siran ahní rehcatáro. ⁵Sácajaquin wiya cayin bár cuácayat rehratí obir yájcayatro. Imár ístito. Býinan eyta reháyatan, éyinan Sirat imár cuitar yajquíc acor itro. Eyinat rícara cat, chéycara cat Sir ojcor etiti conro. Sirat imár cuitar yajcayta acu etiti conro. ⁶Cuatán sácajaquin wiya ahní rehquíc icar rehquít bitar utar yajcayat éyinra chéinan wanro. Sir tamo síhw̃ati étarwan chéinan wanro. Estají cuar sácajaquin éytaro. ⁷Uw quin uch chih́tá yajc aywi. Uw quínoan sácajaquin wiya obir yajc aywi. Eyta yajcáyatan, uwat eyin rio báreyra. ⁸Cuat býinat imár cáyintar, tetintar, abintar, cohtintar, caquintar ajcá bár chácyeýra, éyinat Sir chih́tá wacar éytaro. Býinatan imár cayin ajcá bár jácayatan, éyinat ur ay bár yajcaro. Sir chih́tá cati binat yajquír ay baran cuít yajcaro.

⁹Chauquín sácajaquin wiya sicar biyin obir yajquín acu caquin síhw̃ayatra, uchta bin caw̃ i. Chauwican bara sesenta cuít bin caw̃ i. Réccaram ra istaná bin jor yehw̃ jaquin caw̃ i. ¹⁰Sácajaquin wiyin býinat ay yajátara, sasá ay cac sijáctara, ubach cat, ira cat istiti bin quin wíjactara, Sir chiwa acu cacumí chájactara, cuayin obir yajátara, bahnác etiti ay yajátara, uwat ey ójcoran ay wacátaro. Chauca eyta bin sácajaquin wiya owár obir yajquín acu caw̃ i.

¹¹Cuatán wábjirinra cati jaw̃ i. Wábjirin quino Sir bach yajc ayti jaw̃ i. Anto wábjirin cácyeyra birá cuanyat urá bar tehnota óraro. Awan ra cuaca racar rehcata óraro. Eyta cuácayat, Jesucristo chiwa obir yajquíc et báhqueyera. ¹²Ra cuaca racar rehcatay, imarat récaji yajquín wájác ey tehmoýqueyera. Réccajian Sir canar yajquín acu ra bár itin wájáquinro. Eyta cuar bucoy ra cuac cun rehcata óraro. Eyta wájác cuar bucoy urá tehmoýqueyera. Urá tehmoýat, Sir tayar yajcaro. ¹³Etar cat sácajaquin wiya wabjir eyin cácyeyra, eyin cay bár rehquít, istiy usi istiy usi cuayir pasear yacot beta óraro. Pasear yacot be rabar uw ríotaro. Téwajar bin tew̃ ót bétaro. ¹⁴Eyta cuácayat sácajaquin wiya wábjirin acu ajatán uchta yajquín wacaro. Eyinat ra cuácataro. Ra cuaquir cuitar sasá cohnátaro. Etar sasá cohnár car sasá cat, ra cat ajcá ji béowi, wacaro, sácajaquin wiya wábjirin quin. Eyta cuácayat quehsí binat is cahmí icar icúr ques icar téwajatro. ¹⁵Sácajaquin wiya wábjirin cahujínatra Sir chih́tá bar wácajacro. Wacar Satanás chiwa chájacro. Cahujín cat eyta wácati acu aját eyin quin ra cuaquin wac ayro.

¹⁶Sir chih́tá cájaquinat imár uwa sicar sácajaquin wiya che rehcatay, éyinat chauc eya obir yajcátaro. Eyta obir yajcayat cábaro. Etar Jesús chiwa owár binat

ey icúr acui obir yájcátrato. Eyta cuácayat Jesús chiwa owár binat sácajaquin wiya cayin bár binan obir yajcátaro. Sácajaquin wiya obir yajcata ojcor aját eyta ehcuro.

Los ancianos

¹⁷Werjayín Jesús chiwa acu carin ay bi rehcayat werjayín eyin uwat ajcá ji béyataro. Werjayinatán Sir chihtá ohca sinti ehcúctara, ohca sinti síw ictara, ay ehcúc sehwar car ay túnataro. ¹⁸Sirat carit cuitar uchta wacaro:

Vacat ritút cucú chuquey uquin saw saw saw ayat, vaca eyta yajcáy raujac ey quin cucú yay áytira yajti jawí. Ey quin cucú cuitar sawi tayar tunwí, wacaro.

Uch cat wacaro:


Cacmát canar yajquíc tehmár tayar yarsa túnata binro.

¹⁹Bah quin cuisa istanác bijiyat werjáy cahmí icar tew ictara, ey ria rahcti jawí. Cuatán cuisa bucáy bínatara, bay bínatara tewyat eyin ria rahcwi. ²⁰Werjáy istiyát ur ay baran acsar etiti yajcayat uw bahnaquin cac cahm bahat ajc tec cuitar wawí. Ajc tec cuitar wacayat werjayín cahujín ehúr wini jácataro. Ehúr wini jácayat ay batra yájcátrato.

²¹Sir ub cahmar, Jesucristo ub cahmar, cuacúr Sir cacmín cájaquin ub cahmar bah quin aját eyta wacaro. Chihtá ey wácati yajwí. Býinat ur ay bár acsar etiti yajcayat, chiwa cac cahmar eyin quin ajc tec cuitar wawí. Bah íwoquin tacat, bah íwoquin bár tacat, ajc tec cuitar wawí. Chihtá istanác cuitar eyta wawí.

²²Bahat uwa cara yehn ayin cahmoran ay séhwawi. Inic cuat cara yehn ayti jawí. Ay séhwati yehn áyeyra, ur ay bár bin yehnata óraro. Ur ay bár bin yehn áyeyra behm oquís yehnáyqueyra. Eyta bira bahat Sir tayar yajti acu yají chawí.

²³Bah cab istiy cab istiy urá yarir eyat yatro. Eyta cuácayat riha ima yahquíc ey etwi. Ahra chistár ub bacú cat yahwi. Urá yarir yarti acu ey cat yahwi.



(1 Timoteo 5.18)

²⁴ Cahujinat ur ay bār yajcáyatan, bahnáquinat itro. Anto bahat cat chiwat cat eyin quin táyoti cuat bahnáquinat éyinat ur ay bār yajác itro. Cuatán cahujinat ur ay bār yajcayat, in istá báreyra. Uwat semar, semar istáyqueyra. ²⁵ Ur ay yajquey cat éytaro. Cahujinat ur ay yájqueyan bahnáquinat itro. Cuatán cahujinat ur ay yájqueyra bahnáquinat in istá báreyra. Cuat ur ay yajquey bahnáquinat birá cuanyat istítira rehca báreyra.

Los siervos

6 ¹ Jesús chiwa cahujinan istiy acu cacumró. Cacúm acu caran eyan cayibro. Camín éyinat imár carin ajcá ji bey aywi. Carin chihtá cat ay cac aywi. Eyta cácat, uwat Sir ojcor cat, isat siw̄quey ojcor cat ahsín tew̄a báreyra. ² Cacúm cayíb cat Jesús chiwa yehnjaquin óraro. Cacúm cayíb cat Jesús chiwa tacat cacmín quin ey chihtá cac aywi. Ahra Jesús chihtá cut imar rabin etar ey chíhtara cati síhw̄actara, eyin quin cac aywi. Cuatán cayíb Jesús chíwatara, “rábintara eyin chihntawan cuít cácata” siw̄ i. “Imár rabin etar eyin ácuan ay yajcata,” siw̄ i. Ahra rabin cuácayat sehna can cuít etar eyta yajc aywi. Ima rabin acu yajquíc etar canar ay yajc aywi. Uwa eyta yajquín acu siw̄ i. Eyta yajc aywi.

La religión y el contentamiento

³ Uw istiyát wacaro: “Aját Sir chihtá siw̄ro,” wacaro. Eyta waquíc cuar Sir chihtá síw̄tiro. Cara Jesucristo chihtá síw̄tiro. Jesucristo Sir wacjá síhw̄ati cuar chihtá istiy siw̄ro. Bfyinat eyta síw̄ayatan, ⁴ imaran urán bow̄an bahnaquin cuít síhw̄aro. Uw eyta séhw̄aquinra urá batro. Cuatán uw owár tecua racar isoro. Chiht istiy ques, chiht istiy ques tecua racar isoro. Eyta tecua racar rabar uwat uw sar rahra rahra bor yajcaro. Rahra, rahra wahw̄ úr cat ténati yajcaro. Rahra, rahra cat ahsín tew̄ro. Rahra, rahra cat ríoro. ⁵ Uw owár rahra, rahra etiti técuaro. Uw éyinra ur icar ay síhw̄ajatro. Chihtá uní bi wacar imár urá bār rehjecro. Eyinat uchta síhw̄aro: “Isat Sir tamo síhw̄ayat rayan cuít sécuataro,” síhw̄aro. Eyta síhw̄ayat cuayir síhw̄aro. ⁶ Eyta cuar Sir chihtá caca rabar, “Asan ohbac itro,” síhw̄ayat, ayan cuitro. ⁷ Isan ab ubot wicáyatan isra ray bār wijacro. Eyta cat yájcajareht is sácayatan ray bār ata bétaro. ⁸ Eyta cuácayat ah uch cutar yayín acu chéitara, oya ow̄ in acu chéitara, im ey cuitar étanan ohbac ítataro. ⁹ Cuatán bíyinan oyin rayin yin cun cuácayat, éyinra Sisramat cayar beyátaro. Eyin quin ay bār yajc áyataro. Ray racar rehquít bitar útara ay bār yajca racar isota óraro. Ay bār yajcayat, bar cuecwátaro. Ur ay bār icar áyataro. ¹⁰ Ray rácara cuít isóyatan, icuran biyan bahnác ur ay bār yajcaro. Cahujinat ray racar isóc rehquít Sir chihtá waca téjecro. Waca ter imár urá bār rehjecro. Cueat cuít cuácaro.

La buena lucha de la fe

¹¹ Cuatán bahra Sir tamo séhw̄aquinbro. Etar ray racar isoti jaw̄ i. Cuat uch yajw̄ i. Ur ay cat yajw̄ i. Sir ojcor cat conwi. Jesusat bah síwata cat séhw̄awi. Uw

cat sehnác chawĩ i. Sir chihtá wácati cat tan uwĩ i. Cahujín owár cat técuati jawĩ i. ¹²Bahat Jesús tamo ay sehwan acu urán tanan cuít chawĩ i. Ur istanác cuitar eyta chawĩ i. Bah urán tanan eyta rehçayat, bah yaryat Sir jor cuacúr bur cut suw cut ítataro. Réçajian ricá cac cahmar behmát Jesús chihtá çajac ehçujacro. Eyta ehçwáyatan Sirat bahan ima jor itin wajacro. Eyta bira ey tamoan cuít séhwanawi. ¹³Aját Sir ub cahmar Jesucristo ub cahmar bah quin wacaro. Sirat uw cat, ruwa cat, bahnáquinan estají itin waquí çhájaquinro. Jesucristo eyat Poncio Pilato gobernador cac cahmar im ojcor caba ehçujacro. ¹⁴Aját ey ub cahmar bah quin uchta yajc ayro. Sir chihtá ay çawĩ i. Bah çahmí icar bi ques icar téwajar rehçayta acu çawĩ i. Cara Jesucristoan çajc uch cut sicor wic oço tas eyta çawĩ i. ¹⁵⁻¹⁶Jesucristo wiquíc cab cucayat Sir imát çajc uch cut áyayqueyra. Siran cara tahnác éyatan Jesucristo áyayqueyra. Carin bahnaquin acu Sir eya çaran cuitro. Çaran tahnacro. Eyan bur cut sur cut çinti ítayqueyra. Cuatán çahujinra eyta cat batro. Siran wan beo beo cuít cuácayatan, çahujinra ey quínora çuwajarcuano. Uwat çahmor cat ub cut ey ístítiro. Ah cat, ub cut ístajatro. Eyta cuácayat, ey tamoan uwat ay séhwanawi. Ey çihhtaran wácati çawĩ i. Eyta jawĩ i. Amén.

¹⁷Oya ji, ray ji eyin quínoan bahatán uchta yajc aywi. Eyin quino imaran bahnaquin cuitra sihwā ayti jawĩ i. “Imár oya cuitar, ray cuitar bahnác caba yajcata,” síhwāti acu siwĩ i. Oya cat ray cat çab rehti sicor bár çhácata cuácayat ey cuitar caba yajcata síhwāti acu siwĩ i. Cuatán Sir imat eyin cuitar yajcata chihtá siwĩ i. Sirat is quin icuran biyan bahnác wíçaro. Is ohbac itin acu bahnác wíçaro. ¹⁸Cuat oyan cuít bin quin rayan cuít bin quin ay yajc aywi. Ayan to yajc aywi. Es yajti çuar çahujín quino cat racar wic aywi. ¹⁹Eyta yajçayat awan Sir imát sicor túnayqueyra. Sirat eyta tunyat, eyin bur cut suw cut ítayqueyra. Sir jor ohbac ítayqueyra.

Encargo final a Timoteo

²⁰Timotéou, bahat Sir chihtá ehçún acu wíjaqueyan bahatán ey tehmoti siwĩ i. Tehmoti ehçuwi. Çahujinat chihtá istiy ehçwá rabar, chihtá uní bi siwĩ ic wacaro. Eyta wac çuar çuayir tewró. Chihtá eyra Siray batro. Chihtá eyra rahcti jawĩ i. Yají jawĩ i. ²¹Çahujinat ey chihtá çaquir cat Sir chihtá wáçajacro. Eyta bira ey çihhtara çati jawĩ i. ¿Sir chihtá rúhwanajauí? Aját Sirat bah obir yajçayta acu çonro.